



Steve Croes ta contento cu e ta liber y e kier sigui traha riba Tattoo

Semper el a keda cu fe den Dios

ORANJESTAD(AAN): Ayera tardi despues cu Steve Croes, kende a wordo deteni recientemente relaciona cu e caso di Natalee Holloway, a wordo laga den libertad, prensa a acudi masalmente na su cas, pa asina haya un declaracion di su parti.

Steve Croes a dirigi su mes na prensa papiando Ingles, pa asina e no mester ripiti su mes. El a splica cu e no kier a duna ningun comentario riba e caso, sinembargo e tabata contento cu por fin nan a realiza cu e ta inocente y cu

nan a lagele bay.

El a bisa cu e tabata hopi cansa y cu e djies kier dal un baño, subi su cama y bay drumi.

Steve a bisa tambe cu na warda di polis el a wordo trata hopi bon y cu e no tin nada di keha.

Loke si tabata hopi fastioso segun Steve, ta e hecho cu e tabata cera den un cel, siendo cu e no ta culpable di algun delito.

Tambe loke tabata dificil ta cu e no tabata permiti di wak su famia.

Prensa a puntra Steve Croes con e conoce e rumannan Kalpoe, sinembargo manera el a bisa prensa anteriormente, e no kier a duna comentario riba cosnan cu tin di haber cu e caso.

Pa loke ta informacion riba e caso, el a bisa cu ora cu e tabata cera den cel, e no tabata permiti di haya informacion riba kico tabata pasando, pasobra conforme ley esaki ta stipula, unda cu e persona den detencion preventivo no ta permiti di haya ni sikiera un corant pa lesa.

El a bisa cu ora cu el a tende cu e lo wordo laga den libertad, el a sinti como si fuera cu e dia y anochi tabata bay mucho lento, pa por fin Dialuna yega, pa e sali for di warda di polis.

El a bisa tambe cu e no por a drumi bon, anticipando e momento yega pa nan lage den libertad.

Prensa a puntra Steve, si e tabata pensa cu e lo a sali liber.

Steve a contesta cu e ta inocente y cu semper e tabata tin fe den Dios.

El a sigui bisa tambe cu despues cu e haya un oportunidad di descansa, e lo bay Kapel di Alto Vista, cende un bela y gradici Dios pa tur cos.

Tambe el a splica cu tin un mucha muher na Merca cu ta hopi special pe y cu e no a haya oportunidad di papia cune ora cu e tabata deteni.

El a bisa cu ora cu e haya un chens, e lo bay un Internet cafe, pa wak si e mucha muher ta "online", pa asina splike tur cos loke a pasa.

Un persona di prensa Mericano a puntra Steve, kico e experiencia aki a siñe di amistad y lealtad.

Steve a contesta cu awor e sa kende ta su amigonan.

Prensa a puntre tambe si e tin pensa di bay traha bek riba Tattoo, unda cu Steve a bisa cu e gusta su trabao masha hopi y cu e kier sigui traha eynan.

Segun Steve, riba Tattoo nan ta pagabo pa bo "have fun".